

21 JUN 2003

Umno-Muhyiddin (Doa)

DOA KHAS UNTUK DR MAHATHIR BERGEMA DIAMINKAN PERWAKILAN

KUALA LUMPUR, 21 Jun (Bernama) -- Selain sanjungan dan ucapan terima kasih kepada Datuk Seri Dr Mahathir Mohamad bagi menghargai jasa dan sumbangannya, Naib Presiden Umno Tan Sri Muhyiddin Yassin turut mengambil kesempatan mendoakan Presiden Umno dan Perdana Menteri supaya sentiasa dirahmati serta dilindungi Allah SWT.

Ketika menyampaikan ucapan penggulungannya pada perhimpunan agung Umno di sini hari ini, Muhyiddin, yang terlebih dahulu memohon maaf bagi pihak seluruh anggota parti, memimpin doa yang ditujukan khas kepada Dr Mahathir dan isteri, Datin Seri Dr Siti Hasmah Mohd Ali.

Doa khusus kepada "Bapak Presiden" yang dibaca Muhyiddin selama kira-kira lima minit itu turut diaminkan oleh beribu-ribu perwakilan dan pemerhati di dalam Dewan Merdeka, Pusat Dagangan Dunia Putra (PWTC), tempat berlangsungnya persidangan itu, serta mereka yang mengikuti ucapan itu melalui siaran litar tertutup di luar dewan itu dan di setiap aras PWTC.

Doa itu, menurut Muhyiddin, adalah susulan kepada doa yang dibaca oleh Dr Mahathir pada akhir ucapan dasarnya Khamis lepas yang mendoakan orang Melayu agar menjadi bangsa yang mulia dan berjaya.

Sepanjang doa diaminkan, Dr Mahathir yang duduk antara Timbalan Perdana Menteri Datuk Seri Abdullah Ahmad Badawi dan Setiausaha Agung Tan Sri Khalil Yaakob di atas pentas, kelihatan menahan sebak dengan menundukkan kepala.

Berikut ialah doa yang dibaca Muhyiddin:

"Bismillahirrahmanirrahim.

"Ya Allah, wahai Tuhan kami, kami mohon kepadamu agar dipanjangkan usia Presiden kami Datuk Seri Dr Mahathir Mohamad dan isteri Datin Seri Dr Siti Hasmah Mohd Ali dan kepada seluruh keluarganya.

"Kurniakanlah kepada beliau kekuatan dan ketajaman akal fikiran untuk terus membantu kami untuk menguruskan dan mentadbir perkumpulan kami ini dalam sebuah keluarga Muslim yang bernama Umno.

"Ya Allah, Ya Tuhan kami, curahkanlah kepada beliau ketinggian ilmu dan budi pekerti untuk terus membantu dan membimbing kami untuk sama-sama mentadbirkan negara kita, bagi memajukan bangsa kami dan bagi memperteguhkan iman dan agama kami sebagai agama Engkau yg diredhai.

"Kurniakanlah kepada mereka berdua kesihatan tubuh badan dan kesejahteraan hidup yang berkekalan hingga ke akhir hayat.

"Anugerahkanlah kepada mereka berdua Ya Allah, Ya Rahman, Ya Rahim, nikmat-Mu, dan rahmat-Mu yang seluas-luasnya agar mereka berdua dapat menikmati kehidupan dengan kebahagiaan dan kesejahteraan, tiupkanlah ke dalam hati pasangan murni ini Ya Allah, ketenangan dan kedamaian, ketenteraman dan kesjukan kalbu.

"Jauhkanlah mereka berdua daripada rasa gusar dan dukacita, hindarkanlah mereka berdua daripada setiap sesuatu yang buruk dan tidak baik. Apalah kiramu Ya Allah, Engkau terima setiap yang baik daripada pemimpin kami yang kami kasihi ini, sebagai amalan orang-orang yang soleh, dan Engkau kurniakanlah sebesar-besar ganjaranMu kepadanya di dunia dan akhirat."

-- BERNAMA

RAR HS KHY ROS